

خطاب الرئيس أنور السادات في عيد العمال

الأهرام: 2-5-1973

بسم الله

أيها الأخوة

إن لقاءنا جميعاً في هذا المكان على هذا النحو وفي هذا اليوم وفي هذه الظروف لقاء له معنى، بل له معان لا يصح أن تفوتنا. هذا المكان - المحلة الكبرى - قلب الدلتا المصرية، قلب الريف المصري، وفي نفس الوقت قلب الصناعة المصرية، معقل ومعقل من أهم معاقلها ورمز من رموز الاستمرار المصري في العمل. ذلك لأن البداية كانت هنا قبل الثورة وزادت ثلاث مرات في الحجم والقدرة بعدها، على هذا النحو في الريف المصري وبالصناعة المصرية فإن المحلة الكبرى تجسد تجسيدا كاملاً نضال الإنسان المصري في القرية وفي المصنع. أي نضال الفلاحين والعمال، أي نضال القوى القائدة في تحالف قوى الشعب العامل.

وفي هذا اليوم وفي احتفالنا بعيد العمال، فإن هذا اللقاء يكتسب معنى كبير في بلد قام تاريخه كله واستمرت حضارته على العمل الإنساني والعمل الإنساني وحده ويهتم تطوره ومستقبله بالعمل الإنساني والعمل الإنساني وحده. في هذه الظروف التي نحاول فيها أن نمسك

بأقدارنا ونتحمل مسؤوليات، وأن نحمي آمالنا وآمال أمتنا ونحمي أرضنا وأرض العرب جميعاً وشرفنا وشرف الأجيال القادمة كلها. فإن هذا اللقاء في هذا المكان على هذا النحو وفي هذا اليوم لا بد أن يحمل إلى جانب المعاني الكبيرة إلهاماً عظيماً يؤكد قيمها ومبادئها، يؤكد لنا أن وحدة الأمة أساس، ويؤكد لنا أن استمرار الأمة ضمان، ويؤكد لنا أن القرية والمصنع هما في نفس الوقت القلعة والمدفع.

ويؤكد لنا أن دور الفلاحين والعمال هو على الخط الأول من النضال، مهما كانت نوعيته اقتصادياً كانت أو اجتماعياً أو دفاعياً. ويؤكد لنا أن الطريق إلى المستقبل وإلى الأمل له مفتاح واحد هو العمل.

ويؤكد لنا أخيراً أن الأمم والشعوب تواجه لحظات حسم ومصير يصبح فيها محتماً عليها أن تحمل أقدارها على أيديها وأن تواجه ما أذن الله لها أن تواجهه.

أيها الأخوة

إنني أقول لكم ببساطة في هذا الاجتماع وفي هذا المكان وفي هذا اليوم وفي هذه الظروف إنني حملت قدرتي كما أذن الله وكما تقضي به المسؤوليات التي حملتها سياسياً ودستورياً. بل إنني أقول إنني حملت قدرتي كما تقضي به المشاعر التي أحس بها كمواطن - كإنسان يعيش على هذه الأرض ويلتزم بالولاء لها ويهب نفسه للدفاع عن حريتها، مؤمناً بأن الحق في جانبها والنصر لها وعلى طريقه وفي سبيله ترخص جميع التضحيات.

أيها الأخوة

إنني أريدكم أن تكونوا جميعاً في الصورة معي لأنكم سوف تكونون جميعاً في المرحلة الشاملة معي، ذلك أن المواجهة الشاملة ليست خطوط قتال فحسب، وإنما هي شئ آخر أشد اختلافاً وأكثر صعوبة - كما قلت لكم - كل قرية قلعة، كل مصنع مدفع. كل إنسان تحت السلاح وكل إنسان تحت النار. لهذا أريدكم جميعاً في الصورة لأنكم جميعاً في المواجهة الشاملة.

لذلك أرى لزاماً عليّ أن أضع أمامكم صورة كاملة عن الموقف اليوم. فمن حقكم، أنتم الذين تمثلون عمال مصر، ومن حق شعب مصر كله بل ومن حق الأمة العربية كلها أن تعيش معنا هذه اللحظات، ونحن نستعرض خط سير قضيتنا، منذ وقف إطلاق النار إلى الآن.

كما تعلمون، كان وقف إطلاق النار الأول ينتهي في نوفمبر 1970، وسافر وزير الخارجية المصري إلى الأمم المتحدة وصدر قرار من الجمعية العامة للأمم المتحدة تطلب إلينا أن نمده فترة أخرى. وكنا في ذلك الوقت - كما تعلمون - في حاجة إلى أن نرتب شئوننا في داخلنا، فمددنا وقف إطلاق النار للمرة الثانية، وكان ينتهي يوم 5 فبراير سنة 1971. قبل ما يبجي المعاد بتاع انتهاء وقف إطلاق النار الثاني في 5 فبراير سنة 1971، اجتمعنا على كل المستويات، مجلس الدفاع الوطني، واللجنة العليا للاتحاد الاشتراكي، واجتمعنا مع اللجنة المركزية. ناقشنا أمورنا واجتمعنا مع القوات المسلحة أيضاً، ومع القادة جميعاً. في هذا الاجتماع الأخير قبل 5 فبراير قبل ما ينتهي وقف إطلاق النار الثاني، كان واضح تماماً أن مبادرة روجرز بتاع سنة 1970 اللي بناء عليها وافقنا على وقف إطلاق النار ووافق الله يرحمه الرئيس جمال في

أغسطس على وقف إطلاق النار وقتها، كان واضح تماماً أن هذه المبادرة أصبحت غير ذات موضوع، لا قيمة لها. كلنا عارفين في أثناء وقف إطلاق النار الأول احتجت إسرائيل أن مصر حركت الصواريخ وأن مصر خرقت وقف إطلاق النار وساندها أمريكا في هذه الدعاوى، ومنذ ذلك الوقت كما سيتضح لكم من تحليل المرحلة كلها، واضح أن الهدف الأساسي اللي بتعمل له إسرائيل وأمريكا هو المحافظة على وقف إطلاق النار زي ما هو موجود النهاردة، ليه؟ لأن ده بيخدم مصالح إسرائيل وبيخدم مصالح أمريكا في المدى القريب والبعيد.

قبل ما أروح لمجلس الشعب في 4 فبراير سنة 1971 وأعلن المبادرة بتاعتي قررنا أن مبادرة روجرز سقطت وانتهت، وأصبحنا غير مقيدين بها. كانت المبادرة فيها نقطتين، وقف إطلاق النار 90 يوم قصاد انسحاب إسرائيل. زي ما قلت لكم تلاعبت إسرائيل وسندتها أمريكا علشان ينسحبوا من تعهدهم بالانسحاب ويفضل وقف إطلاق النار بس اللي همه عايزين يحافظوا عليه لغاية النهاردة.

قبل ما أعلن زي ما قلت لكم المبادرة في 4 فبراير في مجلس الشعب، اتخذنا قرار بسقوط مبادرة روجرز بتاعت سنة 70، أصبحت لا قيمة لها لأن الهدف من ورائها بقى واضح إنه إيقاف إطلاق النار وبس، تحت إيقاف إطلاق النار بتقدر إسرائيل تعمل اللي هي عايزة تعمله، تغير في الأرض العربية، يستمر الحال بحيث أن مجتمعاتنا إحنا من داخلنا نتفجر على نفسها أو إحنا من داخلنا نتاكل والقضية بمضي الوقت يبقى أمر واقع، ده الهدف اللي بيحرصوا عليه لغاية النهاردة.

في 4 فبراير أعلنت قدام مجلس الشعب سنة 71، أعلنت المبادرة بتاعتنا المصرية، كانت إيه؟ وبرضه هنا لازم نأخذ بالنأ لأنه بعد كده حنشوف إزاي بتحاول أمريكا النهاردة إنها تستغلها وتلتوي بها التواء علشان برضه تحقق أهداف إسرائيل.

المبادرة كانت إيه؟ أنا أرسلت للرئيس الأمريكي نيكسون في أول رسالة في يوم 24 ديسمبر سنة 70 ودي كانت رد على رسالة له بعثها لي عن طريق الدكتور فوزي، وكان رئيس الوزراء في ذلك الوقت، فلما حول لي الرسالة الدكتور فوزي، أنا رديت عليها رأساً وقلت للرئيس الأمريكي في أول اتصال في ديسمبر سنة 1970، 24 ديسمبر بالتحديد، قلت له إن كل بادرة من أمريكا، كل خطوة للأمام ستجد خطوة منا أيضاً للأمام، وكل إجراء إيجابي من جانب أمريكا سيجد صدى وإجراء إيجابي من جانب مصر.

وبالمثل فإن أي عمل سلبي أو أي إجراء يكون فيه مساس بمصر سيجد له نفس الصدى من مصر ضد أمريكا. بمعنى إن اللي بيقترب لنا بنقرب له، واللي بيبعد بنبعد إحنا كمان. وعلى ذلك قلت له أنا بأرد على رسالتك مباشرة، إحنا ما متناش، مصر ما ماتتش وما سلمناش ومش حانسلم، ولكن إحنا بنسعى نحو حل سلمي، إذا كان ده ممكن. ما بيناش وبين أمريكا أي عداوة، كل ما بيننا بين أمريكا مشكلة إسرائيل ووقوفها وتأييدها للعدوان الإسرائيلي. مش بس تأييدها لهذا العدوان، خطة العدوان علينا سنة 1967 أقرها الرئيس الأمريكي جونسون، عرضت عليه وأقرها. أرسلت للرئيس الأمريكي نيكسون في ذلك اليوم، يوم 24 ديسمبر، أقول له إن كل بادرة طيبة حاتلاقي منا إحنا رد عليها

فوري، وكل بادرة سيئة أيضاً حان نرد عليها أيضاً بنفس الشكل. لما اتقدمت بالمبادرة في يوم 4 فبراير أمام مجلس الشعب كانت إيه المبادرة. كانت إنه وزي ما كتبت أيضاً للرئيس نيكسون كتابة، قلت له أنا بأعتبر هذه المبادرة مني اختبار، امتحان سلام. امتحان سلام.

انتم بتقولوا عايزين السلام، وإسرائيل مالية العالم إن هي عايزة السلام لكن العرب مش عايزين السلام. طيب إحنا عاوزين السلام، لكن فيه امتحان أهه أنا بأقول إحنا جاهزين نعمل اتفاق سلام. لأول مرة أقول جاهزين لاتفاق سلام ولكن الامتحان فين. إذا كان هناك نية سليمة صادقة صحيح من جانب أمريكا ومن جانب إسرائيل علشان يحققوا السلام، طيب تتفضل إسرائيل تنسحب مرحلة أولى ضمن الحل الشامل داخل سينا، على أن تعبر قواتنا المصرية فوراً، ويتولى يارنج والأمم المتحدة القضية، وبندي فرصة ستة شهور بس، إذا في نهاية الستة أشهر ما تمش الحل النهائي يبقى قواتنا اللي عبرت لها الحق إنها تكمل تحرير الأرض.

دي كانت المبادرة، ومعنى هذا إنه ما كانش فيها إطلاقاً - إنا زي ما قلت وكتبت للرئيس نيكسون إنه امتحان سلام - امتحان للنويا نحو السلام. هل الكلام عن السلام ده حقيقة واللا مجرد ضباب بيتقال علشان يضللوا به العالم زي ما هو حاصل النهاردة.

رحبت أمريكا وابتدت إسرائيل تلعب لعبتها على أمريكا. جينا في أول مايو سنة 1971 وفي حلوان وأعلنت - كان وزير خارجية أمريكا طالب إنه يزور مصر - أعلنت إن إحنا بنرحب به - إحنا أعلننا مبادرتنا وقلنا إن دي امتحان سلام. اللي عاوز يتكلم ما إحناش ممتنعين،

مستعدين نتكلم مع أي مخلوق لأن إحنا عارفين إحنا عايزين إيه. ما احناش خايفين من حاجة، يتفضل يبجي. وفي حلوان في أول مايو سنة 71 أمام عمال حلوان أعلنت يتفضل، ولكن أنا حا أقابله وفي ذهني وفي رأسي ولادي العمال اللي ماتوا في مصنع أبو زعل - وحا أقابله أيضاً وأتكلم وياه وفي ذهني وفي رأسي ولادي الأطفال اللي ماتوا في مدرسة بحر البقر، لأن القنابل أمريكية والطائرات أمريكية والطيارين أيضاً فيهم أمريكيان. بعض الطيارين الأسرى اللي عندي هنا فيهم جنسية مشتركة، أمريكي وإسرائيلي، إنما إحنا مش معقدين، إحنا مستعدين نتكلم ومستعدين نناقش ولكن على أساس السلام اللي يقوم على العدل، مش السلام اللي يقوم على القرصنة أو على اغتيال حقوق الشعب.

وجه روجز وسألته سؤال مباشر - وزير خارجية أمريكا - عاوزين إيه بعد المبادرة بتاعتي، أنا قلت إن دي امتحان سلام، وروني تقدرنا على هذا الامتحان واللا لأ، انتم وإسرائيل؟ سافر من هنا راح على إسرائيل، واستطاعت إسرائيل إنها تسيطر زي ما إحنا شايفين النهاردة تماماً على عقولهم، ولأنه أيضاً الأمريكيان لهم مصالح ظهرت النهاردة في مشكلة الطاقة، لهم مصالح ولهم سياسة في هذه المنطقة. اتفقوا الاتنين وتجاهلوا الامتحان، تجاهلوا المبادرة تجاهل تام.

وفاتت سنة 71 - وفي هذه الأثناء بحكم الظروف - زي ما انتوا عارفين - جات 14 مايو حركة التصحيح، واعتقدوا أصدقائنا في الاتحاد السوفيتي أن هذه الحركة قد تتال من الصداقة اللي بيننا أو شئ. وبعدها في الصيف وقعت أحداث السودان، وكان موقفنا هو الموقف المبدئي اللي إحنا بنؤمن به، فساءت العلاقات أيضاً. المهم إنه في أكتوبر

سنة 71 لما سافرت في 11 أكتوبر سنة 71 إلى الاتحاد السوفيتي وقابلت القادة السوفيت، استطعنا إن إحنا نزيل السحابة دي كلها، واستطعنا إن إحنا نتفق بالنسبة للخطوات المقبلة.

زي ما سبق وأعلنت في أول اجتماع لي مع القادة السوفيت بعد ما شرفني الشعب بانتخابي، كان يوم أول واثنين مارس سنة 1971، وفي محضر هذا الاجتماع أثبت فعلاً ما سنتعرض له إحنا في هذه المنطقة في المرحلة المقبلة في المحضر الرسمي، ولما لم أقتنع فيما أعلنت أنا قبل كده، قلت لهم أنا مش مقتنع ولا بد أن نثبت في المحضر إن إحنا مختلفين. إحنا أصدقاء ما في شك، ولكن مش عيب إن الأصدقاء يختلفوا، وأصريت لأنه كان لنا وجهات نظر وكان للاتحاد السوفيتي وجهة نظر إنه الحل السلمي هو الحل الذي لا حل سواه، مع الأخذ طبعاً بعين الاعتبار إنه يقوي قوتنا الدفاعية.

وأنا كنت بأقول إنه ترك الحال على ما هو عليه في مارس 71 حا يخلي إسرائيل تعربد في المنطقة وحا يخلي أمريكا تتطلق علشان تحقق أهدافها وأهداف إسرائيل.

كان تقديري ولا يزال من وقتها، من مارس سنة 1971 لغاية النهاردة ولغاية بكره، وزى ما أثبتت الأحداث، إنه بالحرب النفسية اللي بتسببها علينا أمريكا وإسرائيل، وبالتسليح اللي لا حدود له، والمساعدات اللي لا حدود لها، اللي بتأخذها إسرائيل من أمريكا، حنيجي يوم نلاقي إسرائيل بتعربد. وده اللي حصل، لماذا راحت أغارت على جنوب لبنان وبعدين ضربت سوريا، وبعدين رجعت ثاني عملت العملية الأخيرة بتاعة

بيروت، اللي إن دلت على شئ فإنما تدل على أن إسرائيل تشعر بحماية أمريكا وتأييدها المطلق إنها تستطيع أن تعمل أي شئ في المنطقة، حتى تدخل البيوت على الناس وتقتل المدنيين وتقتل النساء جوه شققهم وفي بيوتهم في قلب بيروت. هذا العدوان مش عدوان على شقق بيروت بس، وأنا بأكلم النهاردة الأمة العربية كلها، هذا العدوان عدوان على كل عاصمة عربية، على كل بيت عربي، على كل كرامة عربية، على كل عزة عربية، على كل شرف عربي. هذا الهجوم وهذه العريضة الإسرائيلية المؤيدة من الولايات المتحدة، دي مش هجوم على شقق في بيروت، دي هجوم على كل إنسان منا. مرات يوسف النجار اللي ماتت وهيه واقفة بتدافع عن جوزها في قلب شقتها هي أمي وأختي وأمك وأختك، هي كل ما نعيش إحنا علشان نحافظ عليه من شرف ومن إباء عربي.

اللي وقع في بيروت اتكلمت عنه سنة 1971. ونيجي النهاردة للموقف، ما هو الموقف النهاردة؟ الموقف النهاردة أمريكا وإسرائيل طبعاً عايزين استمرار وقف إطلاق النار، ليه؟ من تحت وقف إطلاق النار وحالة السكن اللي إحنا فيها، إسرائيل بتغير في الأرض، بتبني المدن، بتبني المستعمرات ببجاجة ووقاحة على الأرض، في شرم الشيخ يعلنوا ويقولوا إحنا قاعدين إلى الأبد، ويبنوا مكاتب سياحية وفنادق وغيره. في الجولان، في الضفة العربية، في غزة، في سيناء، في كل مكان، عايزين وقت، علشان يمضي الوقت يبقى الأمر الواقع، ويكونوا هم بنوا المدن وبنوا المستعمرات وغيروا المعالم.

علشان كده بنسمع دائماً لغاية يوم أو يومين فاتوا إن أمريكا تعلن أن الهدف الأساسي لأمريكا هو الحفاظ على وقف إطلاق النار، ليه؟ لأن ده

هو اللي بيحقق لها مصالحها هي وإسرائيل. الوقت بيوفت إحنا من هنا بنتترفز على نفسنا جوه مجتمعاتنا وجوه بلادنا نتيجة الجرح والمرارة والألم اللي عملته الهزيمة فينا، في يوم حا ننفجر على نفسنا، مش محتاجة إسرائيل تطلق طلقة، خلاص تكون هي عملت الأمر الواقع في سينا وفي غزة، في الجولان وفي الضفة الغربية، في القدس وفي كل مكان وتنتهي القضية إلى أمر واقع.

علشان كده زي ما قلت أمريكا عايزة وقف إطلاق النار، ودي سياستها المعلنة الرسمية لغاية يوم واثنين حا تقضل تعلنها. أيضاً إسرائيل، أنا حكيت على اجتماع مارس 72 ليه؟ إحنا مفيش خلاف بينا وبين الاتحاد السوفيتي النهاردة إلا على شئ واحد بس لازم يعرف أصدقائنا السوفيت وأنا بأتكلم في العمال وأمام عمال مصر وعلى مسمع من عمال اتحاد الجمهوريات العربية في سوريا وفي ليبيا، والعمال العرب في كل بلد عربي، وعلى أصدقائنا في الاتحاد السوفيتي إنهم يعرفوا إن استمرار وقف إطلاق النار سياسة أمريكية، استمرار وقف إطلاق النار يخدم إسرائيل ويخدم أهداف أمريكا في النهاية.

الحل السلمي. على أصدقائنا في الاتحاد السوفيتي انهم يعرفوا حقيقة مشاعر شعبنا. من أول لحظة وإحنا مؤمنين إن ما أخذ بالقوة لا يسترد بغير القوة. على أصدقائنا في الاتحاد السوفيتي انهم يعرفوا أن الحل السلمي اللي بتتكلم عنه أمريكا، خرافة الحل السلمي اللي بتتكلم عنه أمريكا خداع سراب. حافظ إسماعيل كان هناك في فبراير الماضي من شهر واحد، وزى ما انتم عارفين إحنا مفتوحين على العالم كله، سافر للاتحاد السوفيتي، سافر واشنطن، الولايات المتحدة. وزير الخارجية راح

زار الصين، حيسافر الشهر الجاي حافظ إن شاء الله إلى فرنسا، للخمسة الكبار كلهم اتصلنا في الحملة الدبلوماسية المكثفة اللي سمعتم عنها واللي انتم شايفينها لغاية النهاردة، واللي انتهت أو اللي آخر حاجة فيها حصلت هي قرار مجلس الأمن وطالبنا إحنا من مجلس الأمن إن العالم بقى يبجي يحط كشف حساب يسمع في مجلس الأمن من ممثل السكرتير العام من يارنج يسمع كشف حساب، كفاية تضليل وكفاية تهريج، يسمع العالم إيه اللي تم في القضية من ست سنين.

الحل السلمي الأمريكي خرافة وخداع وتضليل. حافظ إسماعيل زي ما قلت لكم كان هناك، اتكلم وياهم، قابل نيكسون، قابل روجرز في وزارة الخارجية، وقابل كيسنجر أيضاً. إيه اللي مطلوب؟ إيه الحل السلمي اللي بتقول عليه أمريكا؟ إيه أفكار أمريكا؟. الشرعية، يعني نعلن شرعية وجود إسرائيل، يعني نعترف بإسرائيل، طيب بتمن إيه؟ ده علشان القضية تتحرك مش تتحل، لا علشان تتحرك الشرعية. الحجة إياها اللي مسكنها بتاعت زمان. حدود آمنة، حدود آمنة إيه؟ يعني إسرائيل تأخذ الأرض اللي هي تحس إنها بتأمن لها حدودها نبقى جاهزين إن إحنا ندي ضمانات أمن لإسرائيل، لصالح إسرائيل وضد مصالحنا إحنا. علشان إسرائيل كل شئ، كلام أمريكا الحل السلمي الأمريكي، الخرافة، كل شئ فيه مطلوب لإسرائيل، نطمئن إسرائيل، حدود آمنة لإسرائيل، حقوق لإسرائيل، أرض إسرائيل، كل شئ لإسرائيل وكأننا إحنا المعتدين وكأننا إحنا اللي عملنا الحرب وخذنا أرض واحتلينا الأرض وبنغير معالمها. مفيش شئ عن أمننا إطلاقاً. أدي الحل السلمي

في مفهوم أمريكا. علشان كده أنا بأقول أنا بتكلم النهاردة وبأسمع
أصدقائنا السوفيت.

علشان كده أنا بأقول أنا بتكلم النهاردة وبأسمع أصدقائنا في
الاتحاد السوفيتي إن الحل السلمي الأمريكي خرافة، خداع، سراب.
أمريكا عايزة تحقق لإسرائيل عن طريق المفاوضات اللي ما قدرتش
إسرائيل تحققة 67 بعد هزيمة يونيه. إسرائيل ما استطاعتش تحقق حاجة
بالهزيمة اللي حصلت سنة 67 أبدأ، احتل أرض صحيح لكن ما قهرت
إرادتنا أبدأ، ما خلتناش نسلم، ما خدتنش منا توقيع حتى على مجرد
الاعتراف بأي شئ أبدأ. هذا الحل السلمي الأمريكي ليس إلا خرافة
جديدة. ليه؟ علشان تحقق لإسرائيل عن طريق المفاوضات اللي ما
قدرتش إسرائيل تحققة عن طريق المعركة العسكرية.

تماماً زي ما حصل سنة 57، عدوان 56 حصل علينا، ما
استطاعتش إسرائيل تحقق حاجة لا هي ولا إنجلترا ولا فرنسا في ذلك
الوقت. جه مستر دالاس وزير خارجية أمريكا سنة 57، افكر إنه يقدر
يحقق لإنجلترا وفرنسا وإسرائيل اللي ما قدروش يحققوه بالمعركة
الفاشلة بتاعتهم، وحاول عن طريق ما أسماه أيامها بالغزو من الداخل
علينا في أوائل سنة 57 أنه يحقق لهم اللي ما قدروش، ولكن ما
استطاعش في النهاية كان مطلوب إن مصر تعزل، اللي اتعزل هم حلفاء
أمريكا مش مصر اللي اتعزلت في 57. النهاردة بنتكرر نفس الأسطورة
أمريكا بتتكلم عن حل سلمي، بس التحذير اللي أنا بأعلنه أمامكم بأسمعه
لأصدقائنا في الاتحاد السوفيتي، إياكم والحل السلمي الأمريكي الخرافة،
الخداع، تضليل.

نلاحظ أن أمريكا وإسرائيل برضه علشان يكملوا الصفقة
ويكملوا العملية، بيثنوا أعنف حملة نفسية علينا وعلى الأمة العربية منذ
أوائل سنة 72 من بعد الحرب، من بعد الهزيمة مباشرة ماشية صحيح،
إنما اتركزت من أوائل 72 لغاية النهاردة. حملة نفسية مؤداها إن مفيش
فايدة يا عرب ريحوا نفسكم مش حا تقدرنا تواجهوا إسرائيل. المدد
الأمريكي ورا إسرائيل إلى الأبد، المساعدات الأمريكية بنتزل على
إسرائيل زي السيل. لا قبل لكم يا عرب بإسرائيل، مفيش حل قدامكم إلا
المفاوضات، اتفاوضوا مع إسرائيل. وهي محتلة أرضنا. اتفاوضوا مع
إسرائيل.

يقف روجرز وزير الخارجية امبارح بس ويعلن يقول إن
المسألة دي لازم تبتدي بحل جزئي بفتح قناة السويس. أنا قلت لكم
المبادرة بتاعتي خدوها ولووها. برضه علشان مصالح إسرائيل بدال ما
تبقى امتحان سلام زي ما كتبت للرئيس الأمريكي نيكسون كاتبه لهم،
لأمريكا ولإسرائيل. لا عايزين يخلوها مطب نقع إحنا فيه وكأنا ها نفرح
بفتح قناة السويس، وبعدين إسرائيل تأخذ اللي هي بتأخذه والقضية تنتهي
عند هذا الحد. يقف ويقول حل جزئي. نبدأ بحل جزئي فتح قناة السويس.
ليه علشان بيكلم غرب أوروبا، لأن غرب أوروبا عنده أزمة بترول وفتح
قناة السويس مؤكد بيحل المشكلة بالنسبة لغرب أوروبا. طب ده اللي
عرض فتح قناة السويس أنا سنة 71 بس كامتحان سلام إن إسرائيل إذا
كانت هي وأمريكا عايزين السلام مش عايزين السيطرة وفرض
الشروط، طيب تتسحب إسرائيل مرحلة أولى، وقلت في هذه المرحلة
وقت يارنج ما يتولى العملية ست أشهر، وأثناء الست أشهر دول نكون

إحنا بنضف في القناة. أنا اللي عرضت هذا. النهاردة بيتعرض علشان بدل ما يبقى امتحان سلام لهم، عايزين يعملوه مزق لنا إحنا. لا، إحنا مش حا نفرح بفتح قناة السويس وضياع القضية، ولازم يكون موقفنا واضح لهم علشان كتر الكلام وكتر اللت يبطل. مفيش حل جزئي، مفيش حل منفرد مع مصر لوحدها، مفيش مفاوضات إطلاقاً. أدي موقفنا واضح.

لما عرضت أنا المبادرة، المبادرة كانت زي ما قلت امتحان سلام، ولكن كمرحلة علشان إتمام الحل النهائي في ستة أشهر. ما كانش إطلاقاً حل مرحلي، ولا حل جزئي، ولا هيه في ذاتها هدف أبداً، إطلاقاً، ده أنا بأقول وروني نواياكم بأن تنسحب إسرائيل مرحلة توريني إنها فعلاً حتكمل الانسحاب، ويحدد ميعاد الانسحاب النهائي. أمام هذا أنا بأطهر القناة. النهاردة لا، أصبح الكلام كله على إنه القضية لازم تتحرك. طيب تتحرك إزاي؟ تتحرك بحل جزئي يبدأ مع مصر بفتح قناة السويس، وده طبعاً لازم نتفاوض فيه مع إسرائيل، يا إما بواسطة طرف ثالث زي أمريكا ما بنقول. برضه باكرر، لا حل جزئي، لا حل مرحلي، لا حل منفرد، لا مفاوضات، موقفنا واضح. زي ما قلت لكم من أول 1972 وهمه مبتديين الحرب النفسية الشرسة علينا، على العرب، بهدف اليأس. تروح جولدا مائير تزور الولايات المتحدة السنة دي يقوم يطلع بعد زيارتها في الصحف الأمريكية الصفقة الجديدة من طائرات الفانتوم والأسلحة الثانية. وييجي أبا اييان وزير خارجية إسرائيل اللي اصبح وزير خارجية أمريكا والمتحدث باسم أمريكا، يعلن إن الحكومة الأمريكية سربت عمداً المساعدات اللي حتديها لإسرائيل والأعداد

والأرقام من طائرات الفانتوم والأسلحة الثانية وغيرها، سربتها عمداً
علشان تردع العرب، علشان يبقى فيها ردع للعرب، يعني علشان نخاف.

الله، ده في الوقت ده بيتكلموا على حل سلمي، والرئيس
الأمريكي بيتكلم على حل سلمي، وبيقول إنه بيدي الشرق الأوسط أسبقية،
بعد ما اتحلت مشكلة فيتنام أصبحت مشكلة الشرق الأوسط لها أسبقية
خلاص. في نفس هذا الوقت يطلع وزير خارجية إسرائيل زي ما قلت
لكم، اللي هوه في الواقع وزير خارجية أمريكا واللي بيتكلم عنها
وباسمها، يقول إن الحكومة الأمريكية سربت أنباء الصفقة الجديدة اللي
عملتها مع جولدا مائير عمداً علشان تردع العرب، علشان تخوف
العرب، ومفيش تكذيب من أمريكا.

الألعن إنه من كام يوم، من 3 - 4 أيام، وده شئ أنا بأعتبره
في غاية الخطورة، وبرضه عاوز أصدقائنا في الاتحاد السوفيتي يسمعوه،
بيقول إيه أبا اييان وزير خارجية إسرائيل، بيقول إنه أثناء اجتماع
موسكو بين نيكسون وبريجنيف، بريجنيف أصر إن الشرق الأوسط يأخذ
أسبقية في البحث، ولكن نيكسون رفض، ونرجو - ده كلام اييان - إنه
بقى واشنطن لما يسافر بريجنيف يكون موقف نيكسون هو نفس موقفه
في موسكو، يعني ما يديش لقضية الشرق الأوسط الأهمية إذا طلب
بريجنيف هذا.

شيء غريب - الأمر الغريب اللي الإنسان بيستغرب له إن المحادثات
اللي - دارت بين بريجنيف ونيكسون في مايو سنة 72 - السنة اللي
فاتت - والاثنتين زعماء الدولتين الكبار في العالم - ودي في غرفة هما

الاثنتين لوحدهم. يطلع خبرها يروح لايبان وانه بريجنيف طلب من نيكسون إن الشرق الأوسط يكون له أسبقية، قام نيكسون قال له لا - وإن ايبان بيقول لنيكسون إن شاء الله يا نيكسون بقى لما بريجنيف يروح لك واشنطن تعمل كده زي ما عملت في موسكو - إزاي أخبار الرؤساء اللي على هذا المستوى بتطلع إلا إذا كان إسرائيل هي أمريكا، وأمريكا هي إسرائيل. أمر محزن ومخجل، وبعدين ولا تكذيب من أمريكا، أبدأ. كل شئ بتقوله إسرائيل وتعلنه جهاز النهار، تصريح أبا ايبان اللي بأقول لكم عليه ده ولا تعليق عليه. علشان يسمع أصدقائنا في الاتحاد السوفيتي، حتى الجلسة الخاصة اللي بتبقى بين بريجنيف ونيكسون بتكون عند إسرائيل، لأنه لسه أصدقائنا في الاتحاد السوفيتي بيصدقوا في عملية الحل السلمي اللي جاي.

ماشية الحرب النفسية. ودخلت على العالم العربي كله، وللأسف دخلت على البعض عندنا هي في بلدنا للأسف مش من العمال ولا من الفلاحين، ولا من الجنود إطلاقاً - القاعدة الأساسية بتاعة الثورة، القاعدة الأساسية لهذا الشعب سليمة مائة في المائة - سليمة مع قواتها المسلحة. لكن كبشر وكجرح خلاص حانخش على السنة السادسة - النفوس مجروحة، كلنا مهيين. فيه قصور في حاجات كثيرة في الدولة في الخدمات. ما حد ينكر هذا ولا أنكره أنا أبدأ، في قصور ليه لأنه من ست سنين مضت وإحنا بنصرف ما معدله 700 مليون جنيه على القوات المسلحة غير الاعتمادات الإضافية. فيه قصور، ممكن في التليفونات يكون فيه قصور، في المواصلات يكون فيه قصور، في الإسكان فيه قصور - ممكن - شبكاتنا محملة معبأة - كل ده ممكن وبنستحمله. طبعاً

ممکن لأي واحد في مثل الظروف دي وكلنا مجروحين فيها ونفوسنا مجروحة، واللي إحنا كلنا عايشين مرحلة قلقه، وعايشين مرحلة بنشوف فيها حوالينا تطورات في هذا العالم من الكبار ومن الصغار على السواء، بتمس قضيتنا - ممكن لأي واحد وأسهل شيء إنه يقول المواصلات فيها كذا - التموين فيه كذا - شبكة التليفونات - والمجاري طفحت - دا المواصلات أيه - ممكن - وده كله ممكن. بس هل إحنا في ظروف عادية؟ إحنا مش في ظرف عادي زي ما قلت لكم إحنا بنصرف من ست سنين 700 مليون جنيه في السنة. كان مفروض ميزانية القوات المسلحة ما بتزيدش عن 200 أو 250 مليون جنيه يعني فوق الـ 450 مليون جنيه سنوي، كان مفروض إنها في التعمير وفي التنمية ولكن بنقطعها من قوتنا بنقطعها بكفاحنا وعرقنا وبنحطها لقواتنا المسلحة علشان نعيد بناء قواتنا المسلحة وأمكن أن يعاد بناء قواتنا المسلحة على أحسن وأكمل صورة.

وهنا قدامكم وفي عيدكم وباسمكم بأتوجه لكل فرد من أبنائنا في القوات المسلحة على خط النار بأتوجه لهم بكل الشكر والعرفان باسمكم جميعاً وباسم الشعب لأن كل الظروف في الحر والمطر وفي البرد - في كل الظروف قاعدين مرابضين ومستنيين الإشارة بيتلhfوا جميعاً علشان يوصل لهم الأمر، بأطمئنكم عليهم، بظمنكم على اخوتكم وبأقول لكم إن كل اللي صرفناه في المرحلة الماضية في الست سنين وقطعناه من قوتنا

قطعنا بعرقنا من خدماتنا، قطعناه من التنمية علشان أجيلنا ما راحش على الأرض، موجود هناك على القتال وبتشوفوه شرف وكرامة وصمود وإباء وعزة - إعداد كامل في كل لحظة.

كل ده موجود لكن الحملة النفسية اللي قلت لكم عنها استطاعت
إنها تخش إلى بعض النفوس وبعض الناس يقول إيه: طب ما نقعد وننقل
على نفسنا ونبني وبعدين بعد كده نبقى نحرر. مش متاح - وده كله اللي
عايزاه أمريكا وإسرائيل إنه بقاء الحال على ما هو عليه - في السكون
ووقف إطلاق النار بس - دا هو ده المطلوب. دا كل يوم أمريكا
بتحسب، وما أسعدها وما أسعد إسرائيل إن الوضع يفضل زي ما هو.
من خلاله بتبني المستعمرات بتبني المدن، بتغير، بتوضب الشريحة اللي
حا تأخذها من مصر، وبتوضب القطعة اللي حا تأخذها من الجولان،
والقدس تكون كملت محاصرة القدس العربية ونزعت بقية الأرض اللي
مش عارفة تنزعها. في غزة غيرت المعالم وبتغير المعالم. في سينا
تكون بنت المستعمرات زي اللي عملتها في شرم الشيخ وغيرها - هو ده
المطلوب - المطلوب إن إحنا نقعد ساكتين، ونقعد معناها إيه؟ معناها إن
إحنا حا نتاكل جوه نفسنا، من داخلنا إحنا حانفجر على نفسنا من داخلنا،
لأن نفوسنا مجروحة كلنا. ما حدش حايقدر يقعد ساكت أبداً. وإزاي حا
نبنو، نبنو إزاي إذا كان هناك حصار كامل من حولنا.

عملية الميراج الأخيرة اللي انتم سامعين عنها دي اللي إسرائيل
بتقول إن الطائرات اللي جات لمصر ومقدمة حملة عنيفة على
فرنسا علشان توقع بين فرنسا وبين مصر وبين فرنسا وليبيا. وكأنها
إسرائيل - زي ما قلت برضه لإخواننا السوفيت في مارس 71 من
سنتين وشوية إن حا توصل لهذه المرحلة كأنهم أوصية إسرائيل على
المنطقة هنا.

البلد دي بيروح لها كذا، والبلد دي ما يروحهاش كذا، ويروحو يضربوا في جنوب لبنان، يضرب في صيدا، يضرب في بيروت، يضرب في سوريا، يضرب في مصر. ما حدش يقول له حاجة. مش هو ده اللي ماشيين فيه النهاردة - النهاردة الطيارات جات لمصر، يبقى إزاي الكلام ده، وتقوم القيامة لأن إسرائيل لا تسمح ولأنها ولي الأمر في المنطقة هنا. وأمريكا بتساند وواقفة وراء إسرائيل مائة في المائة. أمر غريب.

دخلت الحملة النفسية على البعض هنا. طيب إذا كانت إسرائيل قاعدة تمارس هذا الدور في المنطقة بتأييد ومساندة الولايات المتحدة الكاملين، حانيني إزاي هنا والحصار ده قائم علينا. غرب أوروبا له مصالح في أمريكا، وما يقدرش يدينا، صديقنا الاتحاد السوفيتي بيصل إلى حد معين معانا زي ما قلت لكم قبل كده طيب حانيني إزاي؟ ياريت. كل يوم بنتأخره في وقف إطلاق النار ضرر على القضية خالص، لأنه بيدي خصمنا الفرصة لفرض الأمر الواقع، وهو ده اللي هو عايزه.

دخلت الحملة النفسية على البعض عندنا هنا، وبدال ما يتحول الجرح اللي في قلبنا والحد المير اللي حطته فينا الهزيمة إلى نار وكراهية لأعدائنا، عايزين نكها في نفسنا، تبقى مصيبة كبيرة. لا، علشان كده زي ما بقول لكم كانت النتيجة إنه في المرحلة الماضية البعض هنا اهتزت نفوسهم واهتروا من الحملة النفسية.

أنا مكنش يهمني كثير لما بنقرأ في صحف بعض البلاد العربية الكلام الانهزامي، وكلام التسليم، والكلام اللي مقصود به تثبيط عزيمة العرب

وهمم العرب، وبت الهزيمة في نفوسهم. مكنش بيهمني هذا الكلام لأن أنا عارف إزاي بينشروه هنا، واللي بينشروه دول بيعملوا إيه. ما بيهمني كثير، لكن اللي بيهمني هنا هو بلدنا هنا، داحنا طول عمرنا بوحدتنا الوطنية طبقة واحدة فقط، وحدتنا الوطنية كأساس واجهنا كل المصاعب، واجهنا كل المعارك وانتصرنا بعون الله في كل معركة دخلناها بوحدتنا الوطنية كأساس. دخلت الحملة النفسية عليهم وزى ما بقول أحمد الله أن القاعدة الأساسية لشعبنا لتحالف قوى الشعب العامل سليمة، صلبة، مؤمنة، زي شعبنا ما كان عبر التاريخ، طول عمره ما اتزلزلش أبداً، ما اتهزئت، مش قالوا حرب الأيام الستة، طيب ما فات ست سنين أهى ما هياش أيام ستة ولن نستسلم أبداً لإسرائيل ولا لأمريكا، لن نفرط في شبر واحد من أرضنا، لن نساوم على حقوق شعب فلسطين، لن نستطيع أمريكا أن تقهر إرادتنا أبداً. دي ما قدرتش تقهر إرادة شعب هو شعب فينتام، لن نسلم في إرادتنا. ممكن أخذنا هزيمة عسكرية في سنة 67، لكن لم تهزم إرادتنا ولن تهزم إرادتنا أبداً بعون الله. لأننا شعب مؤمن، صامد، أصيل، عارفين كيف نواجه وواجهنا عبر تاريخنا غزوات وغزوات أكبر من غزوة الأقرام دول المؤيدة من الولايات المتحدة. علشان كده في المرحلة الأخيرة زي انتم ما شفتم، وأمام كل هذا اللي بيجرى من حولنا، أعلنت أن المرحلة اللي إحنا فيها هي بدء مرحلة المواجهة الشاملة، بمعنى إيه؟ المسألة ما عدتش معركة حنعملها على خط النار وبس، لا، المسألة أكبر من هذا بكثير، المسألة إنه هل إحنا حانبقى ونعيش في هذا البلد وأجيالنا من بعدنا حتلاقي وحنفضل مستقلين ولينا إرادتنا واللا لا؟ ما عدتش المسألة معركة عسكرية وحا تنتهي، لا، والمخطط أوسع. المخطط بتتضح أبعاده النهاردة، علاوة على اللي عايزه

تأخذه إسرائيل هو مش بس عايزه تأخذ الأرض، لا دي عايزه تتحكم في المنطقة، الأيدي العاملة رخيصة، تبقى هي مركز الصناعة، هي اللي تشغل، هي اللي تكسب وتشتغل، والمنطقة هنا كلها منطقة نفوذ لها. أمريكا طلعت، بان المستخبي، وهي أزمة الطاقة. أمريكا لها هدف آخر، في أمريكا النهاردة أزمة على البترول، أزمة الطاقة، بيعلنوا انهم قفلوا محطات بنزين كبيرة جداً في أمريكا، وبيعلنوا إن شركات كبيرة قفلت الأجنسات بتاعتها، و.. و.. الخ، ليه؟ لأنه فيه أزمة طاقة ومخزون الطاقة اللي في العالم كله 60% منه في العالم العربي هنا، وبتتولى استخراج شركات أمريكية وغربية.

أمريكا لها مخطط أيضاً، وزى ما رئيس لجنة الطاقة من عشرة أيام كان بينكلم، يقولك إذا اقتضى الأمر ييجوا يحتلوا منابع البترول، علشان يضمنوا إن البترول ما ينقطعش عنهم.

وضح التخطيط، اللي إسرائيل عايزاه تأخذه وتسيطر كمان وتستغل المنطقة، واللي أمريكا تأخذه.

من هنا أنا بأكلم النهاردة إخواننا العرب كلهم، يمكن واحد يسألني يقول ليه الطيب ما هو الموقف العربي النهاردة؟

أقول الموقف العربي النهاردة بيتحسن يوم بعد يوم. زي أنا ما قلت قبل كده أمام اللجنة المركزية ومجلس الشعب، في المؤتمر المشترك. زي أنا ما قلت إن هناك سلبيات في الموقف العربي، مهمتنا النهاردة ما نخدش الأمور لا بعصبية ولا بنرفزة، المسألة لا تحتل عصبية ولا نرفزه لأن

ده مستقبل ومصير، ولكن كل شئ نأخذه بدراسة ووعي وفهم لأبعاد كل مشكلة.

الموقف العربي زي أنا ما قلت فيه سلبيات، لكن فيه إيجابيات وبيتحسن يوم بعد يوم، ولا بد أن تتغلب الإيجابيات على السلبيات.

أول حاجة في الموقف العربي اللي هيه القاعدة الأصلية اللي إحنا بنرتكز عليها هو الاتحاد الثلاثي أو اتحاد الجمهوريات العربية اللي بينا وبين سوريا وليبيا. زي أنا ما قلت قبل كده، وزى ما اتقدمت الحكومة ببيانها أمام مجلس الشعب، يكفي أن يقوم اتحاد الجمهوريات العربية لثلاث دول مصر وسوريا وليبيا، وهم يمثلوا تقريباً نحو نصف الأمة العربية، يكفي أن يقوم هذا الاتحاد من خلال غبار ودخان الهزيمة والمعركة. إحنا كنا في هزيمة، انهزمنا سنة 1967، ومن ضمن استراتيجية أمريكا أنه بتنتهي قضية الوحدة العربية إلى الأبد تمهيداً للقضاء على النظم التقدمية، وبذلك تنتهي مشاكل أمريكا في المنطقة. لا، على العكس، من غبار الهزيمة ولأول مرة ثلاث دول مع بعض بيقوم اتحاد الجمهوريات العربية من مصر وسوريا وليبيا، شكل جميع أجهزته من مجلس وزاري، إلى مجلس أمة اتحادي، ووزراء اتحاديين وبيباشروا وماشييين، صحيح بخطوات وثيدة، ولكن خطوات ثابتة وأكيدة على الطريق من خلال الهزيمة. دي القاعدة الأصلية اللي إحنا بنرتكز عليها. بينا وما بين سوريا زي زمان انتم عارفين فيه قيادة موحدة بالنسبة لقواتنا المسلحة، وتفاهم كامل على كل شئ. بينا وما بين ليبيا سامعين انتم سبتم الإجراءات والدراسات في اللجان المختصة علشان قيام الوحدة الكاملة بين مصر وليبيا هذا العام. ماشيين. مش واقفين، وبرغم أن اللي

كان بينتظره أعداؤنا هو العكس، هو إنا في هذه المرحلة تنتهي نهائياً قضية الوحدة العربية أو الصلات اللي بين كل دولة والثانية.

النهاردة بيسعدني إني أعلن أمامكم أن العراق بدأ في ممارسة دوره القومي بالنسبة للمعركة.

القائد العام الفريق أول إسماعيل، زي ما انتم عارفين سافر في رحلة، هو اليوم في العراق. العراق بيمارس اليوم مسئولياته على المستوى القومي، وما في شك إنا كلنا بنرحب به في هذه المرحلة.

السعودية، لعلنا سمعنا تصريح وزير البترول في أمريكا، في السعودية هناك اتصالات ثنائية بيننا وما بين بعض. والسعودية تقف وتؤيد. ونحن كما قلت، وكما سأقول دائماً، لن نطلب من أي أخ عربي أكثر مما سنؤديه إنا أنفسنا. إنا الأول حنضرب المثل بنفسنا وحنحرك، وحنكسر الجمود والسكون اللي موجود، وبعدها كل أخ عربي عليه أن يقوم بمسئوليته، وعليه أن يقوم بدوره.

السعودية، الكويت أيضاً، الجزائر قامت بدور بالنسبة لبعض الأخوة أيضاً في المعركة. المغرب على بعد الشقة برضه بدأ يساهم. زي ما بأقول فيه سلبيات لكن فيه إيجابيات. والإيجابيات قطعاً ستكون وعلينا أن نجعلها أكثر من السلبيات، وأنا كلي تفاؤل بهذا، خصوصاً زي ما أنا بأكرر قدامكم وبأقول علشان يسمع إخوانا العرب جميعاً إن إنا لم نطلب من أي شقيق أو أخ عربي أن يفعل إلا حينما يرانا إنا بنبدأ. ما بنطلبش من حد إلا لما يشوفنا إنا بنعمل الأول. خلاصة الموقف العربي في تقديري إنه بيتحسن، ولكن الموقف العربي لن يعطي أحسن مما عنده إلا حينما

نبدأ نحن بالحركة. وهنا في الموقف العربي لازم أقول شئ مهم هو الوضع الفلسطيني سواء داخل الأرض المحتلة أو خارجها، وفي داخل الأرض المحتلة يحاول العدو إنه يكثف حملته علشان يعمل تعايش، وأظن وضح له بعد حادث بيروت، وضح للعدو أن كل اللي بناه كان على الرمل خلال السنين اللي فاتت كلها.

أنا يهمني أن أقول لكم إن أنا أرسلت لهم داخل الأرض المحتلة، وأمامكم الآن وهم سامعين وقلت لهم اصمدوا الليل مش حايطول كثير، وقلت لهم بصريح العبارة وبأكررها مرة أخرى علشان يسمعوها لن نسمح لأي مساومة على حقوق شعب فلسطين، ولن نسمح إطلاقاً بأن تهدر قضية فلسطين تحت أي شعار، أو بواسطة أي مسئول عربي. أنا بعث لهم ده كله وبأكرر ثاني أمامكم. إنما في خارج الأرض المحتلة بيهمني إني أتكلم عن نقطة في غاية الخطورة. في خارج الأرض المحتلة إحنا شايفين النهاردة إن إسرائيل عمالة تطارد الفلسطينيين بكل شراسة وبكل اجرام. الحادث اللي وقع في بيروت على بيوت آمنة مطمئنة، شقق مدنية، وتيجي إسرائيل وهي عضو في الأمم المتحدة تعلن إنها كدولة ارتكبت جرائم القتل عمداً. أنا زي ما قلت في الأول حقيقة هذا الذي حدث في بيروت في وجه كل عربي حاكم أو محكوم، وفي شرف كل عربي وفي بيت كل عربي حاكم أو محكوم. إحنا هنا في مصر لا نخجل أن نقول هذا و علشان كده إحنا بنقوله و بنعد علشان نستطيع أن العردة دي والكلام ده يقف كله ويكون له نهاية ويكون له حسم، إذا انتهينا من الموقف العربي بيهمني نعرف بقية المواقف. الدول الغير منحازة وزى ما شفتم رحلتي كانت لبريوني ومقابلتي مع الرئيس تيتو، والرئيس تيتو

أرسل إلى الدول غير المنحازة وأرسل أيضاً إلى الدول الكبرى جميعاً، وحت له الردود وأخطرتني بها وكان بيتعجب من بعض ردود الدول الكبرى زي أمريكا. المناقشة الأخيرة في الأمم المتحدة، زي ما قلت لكم أنا بأعتبر إن اللي وقع في بيروت في وجهه وشرف وكرامة كل عربي حاكم أو محكوم. وإحنا منهم وأولهم ما بنخجل نقول هذا لأن لازم يكون لهذا نهاية.

في الأمم المتحدة زي ما قلت لكم الدكتور الزيات طلب رسمياً إن العالم يسمع تقرير عن القضية من يوم قرار 242 لغاية النهاردة خمس سنين ونص، يسمع تقرير من ممثل السكرتير العام، وتحدد الأمم المتحدة موقفها من قراراتها وتحدد الأمم المتحدة موقفها من إسرائيل اللي بتتحدى العالم كله، بتتحدى الإرادة العالمية، بتتحدى قرارات الأمم المتحدة، بتتحدى قرارات مجلس الأمن وتهزأ بها. بتهزأ بكل شئ. كل ده بحماية ومساندة الولايات المتحدة الأمريكية. طلبنا إنه يجي الكلام ده كله يتخط قدام العالم، لأن كفاية بقي مهازل ولازم العالم كله يسمع. في الفترة الماضية قامت علينا حملة صحفية ضارية شرسة، ولا زال بعضها لغاية النهاردة، سواء في أمريكا أو في أوروبا وتشويه كامل لموقفنا، وكأننا إحنا المعتدين مش المعتدى عليهم. وكأننا إحنا اللي بنهزأ بالعالم وبقارات الأمم المتحدة وبنرتكب جرائم القتل جهاراً نهاراً باسم الدولة زي اللي بتعمله إسرائيل. حملة صحفية ماشية، ماشية في أوروبا وماشية في أمريكا.

لا بد بقي، إحنا طلبنا مجلس الأمن يجتمع علشان حقائق القضية كلها تنتقل قدام العالم وقدام صحافة العالم يتقال، يارنج اتصل بنا

امتى واتصل بإسرائيل امتى وقال لنا إيه وردينا إيه، وقال لإسرائيل إيه وإسرائيل ردت إيه. اللي كانو بيتجنبوه دائماً. بنحط كل شئ بوضوح. ليه ده أمر حيوي وأساسي في تحركنا الدبلوماسي المقبل. طيب ما حدش يتصور إن ده نهاية تحركنا الدبلوماسي أبداً، لأن أنا قلت تحركنا الدبلوماسي ماشي قبل المعركة وأثناء المعركة وبعد المعركة. التحرك الدبلوماسي ما يقفش، ولكن هناك علامات على الطريق. اجتماع مجلس الأمن المقبل علشان يضع تفاصيل القضية كلها أمام العالم اللي بيحاولوا النهاردة بحملة صحفية شرسة متعمدة اللي بيطلقوها في أوروبا وفي أمريكا لازم نضعها أمام الرأي العام العالمي كله. وإحنا ماشيين في طريقنا، الإعداد والحملة الدبلوماسية، الإعداد للمعركة والحملة الدبلوماسية.

فرنسا، حكيت لكم عن محاولات التوقيع اللي بتعملها إسرائيل بينا وبينها، بين فرنسا وبيننا وبين فرنسا وليبيا، وكان إسرائيل بقت الوصي الشرعي على المنطقة اللي نقول الدولة دي يروح لها طائرات ودي لا يروح لها دبابات ودي ما يروحهاش. بريطانيا واقفة عند موقفها، وأنا يسعدني هنا في هذا العيد وأمامكم في هذه المناسبة لأول مرة كنت بأتكلم بعد اجتماع مجلس الأمن. بيسعدني إني أوجه الشكر حقيقي إلى فرنسا وإلى إنجلترا على موقفهم في مجلس الأمن أخيراً. حقيقي إن القرار اللي كان لازم يصدر ماصدرش، إلا أن موقف فرنسا وإنجلترا كان موقف مشرف ومع الحق ومع العدالة، وكان يسعدني جداً ويسعدنا هنا إن أمريكا تستخدم الفيتو علشان إن كان لها بقية من أصدقاء

في هذا العالم يعرفوا من هي أمريكا النهاردة. وبعد حادث بيروت يعرفوا كويس من هي أمريكا النهاردة.

موقف إيطاليا، فوجئنا في الأسبوع الماضي بشيء غريب. طلع إن أندريوتي بتاع إيطاليا قال قدم مشروع، والمشروع ده فيه حل للقضية. بقى الراجل عايز يساهم في حل القضية باعتبار إن إيطاليا من الدول اللي لها مصالح كثيرة معانا اقتصادياً من ناحية، ولها أيضاً مصلحة في فتح قناة السويس لأنها متضررة من قفل القناة كأكثر من أي دولة أخرى، فيحاولوا يبذلوا مجهود. كان هنا وزير خارجيتهم في مصر في الشهرين اللي فاتم وقابلته واتكلم معايا واتكلم في أن إيطاليا عايزة تبذل مجهود. وأنا قلت له ما عندناش مانع، أي واحد عايز يبذل جهد إحنا بنرحب بهذا، ولكن موقفنا حدوده أهه، الموقف اللي إحنا كلنا عارفينه، عايزين يفشلوا أو يوقعوا بينا وما بين إيطاليا كمان. قاموا قالوا أندريوتي مقدم مشروع علشان قناة السويس جديدة تشترك فيها إسرائيل. بقى الحكاية إيه؟ سنة 68 فوجئنا في الصيف، جاي لنا وزير من وزراء الصومال برسالة عاجلة من رئيس جمهورية الصومال في ذلك الوقت المرحوم شارماركي وقال إن فيه رسالة خطيرة عايز يعرضها على الرئيس جمال الله يرحمه، وكنت موجود وياه. إيه الرسالة؟ فجه وقال والله رئيس الجمهورية الرئيس شارماركي رئيس الصومال اتصلوا به من أمريكا، ويعتبر إن هذه الرسالة عاجلة وعلشان كده بعث الوزير ده بها، وكان هو نفسه شارماركي رئيس الجمهورية حاجي، لكن وجد إن الوقت ما هواش مناسب يمكن بالنسبة لنا، فبعث الوزير بتاعه بسرعة. الرسالة إيه؟ قالوا القضية حنتحل، وتتحل ببساطة خالص وبدون معركة. شركة بنامية

مقدمة مشروع قال في سينا من على خليج السويس تأخذ خط مستقيم بدل قناة السويس اللي موجودة ماشية متعرجة، لا تأخذ خط مستقيم من خليج السويس مباشرة للبحر الأبيض، وبآلات الحفر الجديدة وبالمعدات الجديدة ما تأخذش أكثر من 18 شهر، والقناة دي منها تبقى فيها رايح وجي وعليها مناطق تجارة حرة على طرفي القناة بعمق 10 كيلو، خمسة كيلو يمينها وخمسة كيلو شمالها، وإن مصر تؤجر للشركة اللي حا تعمل القناة دي تؤجر لها القناة 99 سنة زي قناة السويس زمان. المشروع زي ما قلت لكم طبعاً ماكانتش شركة بنامية ولا حاجة، معروف إنها أمريكا، ومعروف إن العملية كلها أمريكياني وخلصنا من قناة السويس القديمة نطلع في قناة السويس جديدة، وكمان دي قال تبقى حاجز ما بيننا وما بين إسرائيل. طبعاً هذا الكلام ما كانش محل مناقشة على الإطلاق، ورفضناه من أساسه.

الأسبوع ده بيحيوه وبيقولوا إن أندريوتي بتاع إيطاليا بيعرض هذا المشروع وانه عرضه علينا. طب أنا أمامكم وأمام العالم كله بأسمعهم، لم يعرض علينا شئ لا من إيطاليا ولا من غير إيطاليا، وإذا فكر حد إنه يعرض بعد ما سمع مني، مرفوض شكلاً وموضوعاً. مفيش حاجة لكن لازم يوقعوا بيننا وما بين إيطاليا زي ما بيحاولوا يوقعوا أيضاً بينا وما بين فرنسا. يبقى ده في الواقع بالنسبة للموقف الخارجي. بالنسبة لأصدقائنا في الاتحاد السوفيتي أرجو أن لا يظن أحد إن حديثي عنهم أو حديثي عن العلاقات المصرية السوفيتية وراء حملة أو أي شئ. أظن ثبت من الموقف اللي وقفناه هنا في الصيف الماضي إن إحنا ما بنشتغلش بوشين ولا بسياستين، إحنا بنشتغل بسياسة واحدة ووش واحد، وقراراتنا

وطنية وليست قرارات الاتفاق مع حد لضرب حد. لا، إحنا بنتخذ قراراتنا من هنا في مصر لمصلحة مصر وقرارات وطنية. وأظن القرارات في الصيف وضح لإخواننا وأصدقائنا القادة السوفيت إنها ما كانتش لعبة من ورا ضهرهم بالاتفاق مع الأمريكان أو بالاتفاق مع أي حد آخر. إحنا ناس شرفاء نقدر للصديق موقفه، ممكن نختلف وياه لكن نختلف وإحنا أشرف، ما نختلفش بخيانة ولا بغدر أبداً.

أظن ثبت هذا ووضح من موقفنا. أنا مصدر كلامي كله لأصدقائنا السوفيت. ما أريد أن أقوله لأصدقائنا السوفيت النهاردة في عيد العمال، وفي عيدهم، إنه الحل السلمي الأمريكي سراب وخداع وتضليل. ما أريد أن أقوله لأصدقائنا في الاتحاد السوفيتي أن إحنا أصدقاء ولا نبيع الصداقة، ولا نتخذ مواقف ذات وجهين ولا سياستين. لنا وجه واحد ولنا سياسة واحدة ما أريد أن أقوله لأصدقائنا في الاتحاد السوفيتي إنه حرصنا على هذه الصداقة هو اللي بيجعلنا نقول فلنكن على حذر، على حذر مما يدبر لهذه المنطقة. ولعل في اتصالاتنا ما يخلينا نكمل الحديث، لأنه برضه مش من المصلحة إن حديث الأصدقاء يكون محل كلام أو مناقشة علنية.

من هذا كله بأوصل لشيء. بعد ما شفتم الوضع والحملة النفسية وموقف أمريكا مع إسرائيل. وبعد ما سمعنا مواقف الدول كلها في الشرق وفي الغرب، والدول غير المنحازة علينا إن إحنا نتذكر إن مفيش حد في العالم بيعمل لصالح حد ما يكونش هوه عارف مصلحته فين. لازم إحنا نكون قبله عارفين مصلحتنا فين وصالحنا فين علشان نخلي العالم يعرف صالحنا فين. أصحاب أي قضية يجب أن يأخذوها في أيديهم. زي ما

وضح لكم إسرائيل وأمريكا عايزين تجميد الموقف على ما هو عليه. إذا كان علينا أن نقبل التحدي، فلا بد أن نغير الأمر الواقع وأن نكسر كل محاولات تجميد الموقف. أظن دي خلاصة ما بنختلفش عليها. من هنا بندخل على فترة المواجهة الشاملة.

في فترة المواجهة الشاملة إيه المهام المطلوبة مننا؟ في فترة المواجهة الشاملة زي ما قلت لكم اللي أصبح واجب محتّم علينا. علشان نقبل التحدي ونكسر الجمود اللي عايزه تفرضه أمريكا وإسرائيل علينا. بأعتقد أن هناك ثلاث مهام زي ما قلت قبل كده:

- المهمة الأولى، هي تحرير الأرض.
- المهمة الثانية، هي إعادة بناء المجتمع.
- المهمة الثالثة، هي إقامة سلام قائم على العدل في هذه المرحلة.

وزي ما قلت لا التحرير حينتظر البناء، ولا البناء ينتظر التحرير. لازم الاتنين يمشوا مع بعض، لا بد التحرير والبناء مع بعض الاتنين. وأنا قبل كده ضربت لكم مثل بالاتحاد السوفيتي لما انضرب في سنة 1941 ووصلوا الألمان لـ 15 كيلو من موسكو. ابتدوا معركتهم والألمان على 15 كيلو من موسكو. مش علشان يحرروا أرضهم بس، لا، علشان يحرروا أرضهم ويعيدوا بناء أنفسهم ودولتهم. بعد 30 سنة بقوا قوة من قوتين كبار في العالم. علشان كده إحنا أنا بأقول فلتكن هزيمة سنة 1967 منطلق لبناء جديد. بأقول هزيمة وبأعترف إن إحنا انهزمنا في سنة 1967. ولكن لنتخذ منها منطلق لبناء جديد، بناء جديد، مش لبناء الدولة وتحرير الأرض فقط، وإنما بناء الإنسان، بناء المواطن،

بناء الوطن، بناء الإرادة، بناء كل ما تحتاجه أجيالنا المقبلة علشان تعيش على وطن حر كريم، أبي شريف.

بيهمني قبل ما أختم كلامي، إني أقول لكم في الفترة الماضية زي ما شفتم، وفي الفترات اللي جاية زرت وبأزور القوات المسلحة. وزى ما انتم عارفين أنا عشت حياتي في بعض منها بينهم، واليوم بأعيش أيضاً معهم. أنا عايزكم تتقوا ثقة كاملة في قواتكم المسلحة، لأنها واثقة في هذا، ولأنها مؤمنة بشعبها وبأهدافها تماماً. عايزكم تكونوا واثقين من ايمانهم، واثقين من وعيهم، واثقين من تدريبهم، واثقين من ثقافتهم، واثقين من تخطيطهم. كونوا واثقين ثقة كاملة لأني في كل مرة بأجتمع بهم - وهم سامعني دلوقت - بأقول لهم شعبكم معلق شرفه في رقبتكم، هم مقدرين هذا، والتمن اللي بيقدموه علشان يكونوا عند هذه الثقة هو أرواحهم، ما بيطالبوش بشئ تاني أبداً، لا بيزايدو ولا بيهرجوا أبداً، جاهزين علشان يضحوا ويقدموا أرواحهم ثمن لثقة شعبهم فيهم. علشان كده عاوزكم تكونوا واثقين ومطمئنين لأبنائكم وكفاءتهم وتدريبهم وتخطيطهم.

أيها الأخوة

سوف تجيء بإذن الله لحظة ندعى فيها جميعاً إلى حمل مسئولية أقدارنا، وأعرف أننا جميعاً لن نتردد. إن هذا الوطن لم يعرف التردد في حياته، لم يعرف التردد في التزامه القومي العربي، ولم يعرف التردد في التزامه الوطني التحرري. لم يعرف التردد في التزامه التقدمي الاجتماعي. لم يعرف التردد أمام التضحية أو أمام الفداء. لقد حمل

مسئوليّاته عبر التجربة العربيّة الحربيّة بكل أهوالها وبأمانته، وحافظ على رسالته، رغم الضربات العنيفة لم ييأس ولم يتراجع، وهو اليوم يحمل أقداره ويتقدم واثقاً بنفسه، واثقاً بأمته، واثقاً في مبادئه، واثقاً في الله ومتوكلاً عليه. ﴿ومن يتوكل على الله فهو حسبه، إن الله بالغ أمره﴾

والسلام عليكم ورحمة الله.